

Aprenèm l'Occitan amassa amb un mot per jorn

Lo moviment Calandreta s'apuèja sus 4 pilars per bastir son foncionament : S'associar per far escòla, l'immersion en occitan, la pedagogia calandreta inspirada de las tecnicas Freinet e de la pedagogia institucionala, e far viure la lenga e la cultura occitana al dintre de l'escòla, de l'associacion e pendent las accions d'autofinançament.

La naissença d'aquel projècte ven de la demanda d'un papà de l'escòla. En debuta d'an me diguèt que li agradariá d'aprene l'occitan mas que sabí pas per ont començar. Me demandèt se seriá possible de li ofrir un mot cada jorn d'escòla, al moment ont ven menar son enfant.

Sa demanda foguèt ausida mas me pausèt questions sus la forma. Ofrir un mot, sens tracha escricha, es pertinent ? Serà pas lèu desmembrat ? E se lo fau per un parent, perque pas permetre a totes de i accedir ? Cossí me pòdi servir de son vam cap a la lenga per lo generalisar ? De que pòdi prepausar e de quin biais ? Un mot per jorn... Cossí lo ligar amb la classa ?

Aprèp qualques jorns de soscadissa, l'idèa es trobada : un afichatge, sus la pòrta de la classa, amb un mot en occitan doblat per una fonetica intuitiva e una illustracion, jos forma de coloratge. A l'encòp clar, legible per totes e ludic.


Ai començat per far una tièra de mots e cercar d'imatges de colorar que correspondan.

Lo problèma màger qu'encontrèri concernís los imatges liures de dreches. Los regents son acostumats de se servir dins los imatges a disposicion sus internet, mas soi pas segura que lor causida d'imatges se faga en foncion dels dreches... Se poiriá far, mas quina complexitat ! Existisson mantuns sitis que prepausan d'imatges liures de dreches mas pas un garantís que la totalitat dels imatges lo sián... Cal tanben téner compte dels gostes de cada regent : imatges figuratius, pròches de la realitat, dessenhhs, tirat d'un album legit en classa, tirat d'un dessenh animat... Mission quasi impossibla ! Faguèri la causida de metre lo maximum d'imatges liures de dreches, mas d'unes lo son pas, o benlèu pas...

Sabi que los enfants aiman los coloratges alara estampí cada imatge sus un fuèlh format A5 amb lo mot escrich en occitan e en fonetic intuitiva.

Prepausi doncas als enfants una banasta amb los mots de colorar en lor explicant que seràn penjats sus la pòrta per ajudar los parents que vòlon aprene la lenga.

Pegui sus la pòrta de la classa o dins un luòc de l'escòla ont i a lo mai de passatge un gran fuèlh roge (per rampelar las colors de l'Occitania). Sus aquel supòrt pegui l'aficha plastificada « Un mot per jorn. Aprenèm l'occitan amassa ».



Aficha pegada sus la pòrta de la classa

M'avisi lèu qu'aquela aficha servís als parents que vòlon descobrir la lenga, als mainatges d'elementari que son curioses cada matin de descobrir lo mot novèl, e tanben (e benlèu subretot) permet als parents e enfants, cada matin d'escambiar a l'entorn de la lenga. Los enfants coneisson lo mot e los parents lo descobrisson, çò que permet als mainatges de mostrar çò que sabon, d'aprene a lor parents (e de còps de se trufar) .

Pòt tanben motivar los enfants cap a la lenga e ne'n far un joc amb lor parents ! Vesi cada matin de pichons e de mai grands, amb lors parents davant l'aficha ! D'unes ensajan de legir, de prononciar, d'autres mòstran que sabon cossí se ditz aquel mot... Un luòc ont las familhas s'encontran al entorn de l'occitan !

Cada matin cambi lo mot e pegui lo mot d'èr sus una pagina de color que serà afichada en classa e que servirà de supòrt a la lectura e a l'escritura.



Lison, 5 ans en talhièr escritura

Mot del jorn mes en pagina per la lectura e l'escritura en classa

En fin d'annada, ne'n farem un album per la bibliotèca de la classa, coma una mena d'imatgièr de la classa, en occitan.

Aquel biais de far a un sens vertadièr per totes e m'avisi que se pòt encara melhora. Los mots causits cada matin pòdon èsser ligats a la sason, a un projècte menat en classa o pòdon èsser tirats del tèxt elegit, de la frasa clau. A cada regent de l'adaptar a son biais de foncionar, a sas envejas !

Lo projècte aquí presentat vos poirà permetre la mesa en plaça aisida d'un protocòle d'utilizacion. Vos prepausi un fichièr d'estampar amb de mots per cada jorn, meses en pagina e illustrats, e l'aficha d'estampar.